

平園紀卷之十一目錄

牌檄

檄邵武等營

檄行督標蔣副將

檄福清營遊擊李應龍

檄委同安朱副將

檄副將郭奇遊擊焦國巡

檄督標王副將

檄委戎旗楊把總



檄漳州江東等各營

檄泉州城守傅叅將

檄同安朱副將

檄鎮標鄒國棟

檄行李英

檄洛陽營遊擊趙雲

檄標三營朱副將

檄沿邊各協營

檄原同安副將

檄福清營遊擊李應龍

檄本標及援剿各營

檄邵武各營

檄漳浦縣

檄遊擊何勇

檄隨征總兵吳桂

檄副將郭奇

照會興泉道

檄邵武副將郭奇

差提弁犯李枝華等

檄黃副將

檄遊擊焦國巡

檄行沿邊各協營

檄行建寧康副將

檄行汀州等營

檄泉州海防廳

平岡紀卷之十一

懋紹漁山

三韓楊 捷元凱著 男懋緒令鴻纂

懋繪今掌

檄邵武等營

為嚴傍盤詰以遏盜萌事照得山寇江拐子哨聚江西廣信撫州一帶近為我三省會師擊敗竄伏深山見吳逆黨羽潰散無可依傍乃復潛遣奸細下海販投鄭經發給偽平夷將軍印劄并偽轄下逆夥劄付

數十百張領回散給偽黨近據投誠人員供稱的實
合亟緝捕爲此票仰該副將照依事理即便多撥目
兵於所轄各處邊僻併大小路各要口以及一切住
宿客店小心堵截盤查凡遇過往各色人等俱要細
加盤問若有包裹行囊及粗細貨擔務須打開查檢
恐有奸宄濶冒夾帶前項偽印劄付若有擒獲即便
多差兵役押解前來有功弁員立行優擢兵目自當
格外厚加賞賚如搜檢並無夾帶前項偽印劄付立
卽放行不許擅動平民一絲一草敢有借端搶奪者
該管將弁立卽嚴行重究該副將身在地方務宜實
心奉行遏絕寇氛毋得因循塞責未便速速

康熙十八年七月二十一日

檄行督標蔣副將

爲懇恩拔擢以圖報効事據該副將呈稱奉調進圍
又奉議裁叩乞恩准賞授汀協實缺非敢舍勞就逸
願仍在軍前衝鋒用命俟掃滅海寇方歸本營等情
到本將軍據此爲照督標中協官兵雖准 部文議
裁但際此逆寇尚強需兵剿禦本將軍業將未便輕
易裁汰情形另文咨覆 總督部院會疏

題留若荷

俞允則該副將之老成練達才勇兼優自當仍留統率督

標勁旅共襄蕩平倘未便再 題則汀州一缺似當
以該副將會 題補授俾收巖疆得人之效且查該
副將自奉調入閩以來東蕩西除勤苦已極必得
題授前缺席可鼓勵勞員等因除經咨會 題請外合
行知照爲此票仰該副將照依事理卽當益殫忠勤
奮勇滅賊聽候會 題汀協現缺以膺

新命可也毋違

康熙十八年八月十五日

檄福清營

爲稟報事據該將呈稱奉本將軍行查山邊地方鄉
民被盜一案行據守備趙士奇回據長樂營把總陳
國連回稱查得鄉民林伯昭同小孩四人因天時炎
熱在庭外乘涼倒睡被賊窺竊擒拿而去等情轉覆
到本將軍據此照得山邊地方係屬內地離海頗遠
若非該營防汛官兵積翫成習漫無隄備何致逆賊
突入內地劫擄人民事先旣不能防患未然事後又
不能窮追剿捕祇以一報塞責及至行查乃云鄉民

乘涼倒睡被賊窺竊擒拿而去等語賊在附近擄掠人誰不有戒心縱使鄉民無知豈有賊至之時尚然熟睡被賊竊拿之理明係汎弁捏詞文飾該將備竟不駁查卽爲轉覆無非上下扶同異欲掩蓋疎防之罪本應立提汎弁重究將該將備叅處以儆玩弛念鄉民俱已逃回姑暫寬一次合行嚴飭爲此票仰該將照依事理仍卽申飭該營防邊各弁日嗣後務要加謹瞭探小心防備不得仍前偷安疎忽致逆賊肆志侵犯敢再玩忽失事定行特叅并鎖拿汎弁重處斷不輕貸慎之

康熙十八年八月二十日

檄委同安朱副將

爲遴委能員以固巖疆事照得同安一汛爲漳泉之咽喉又逼近廈門逆島最爲衝險要區必藉謀勇兼優才堪一面者方可寄以協鎮之任近城守副將馮昭京奉 部議調用所有員缺自難一日懸曠茲查本標副將管左營遊擊事朱起龍才技優長勇畧夙備前此保守泉城功績懋著除卽會疏 題補實授外合先委用爲此會同 總督部院姚牌仰該副將照依事理卽便管理同安城守副將事務該營當逆

孽殘毀之後亟須整頓營伍督率將領訓練士馬尤期戢兵安民相機剿撫鞏固封疆所轄兩營一切兵馬錢糧軍火器械務宜稽核清查毋致虛冒城池倉庫嚴飭巡守毋致疎虞至於邊防要汛尤當相度險易分布扼守以壯疆圉該副將受茲委任須思潔已奉公殫心料理益著忠勤毋得少有意弛致負任用至意仍星卽東裝飛馳前赴同安任事卽將到任日期通報查考勉之毋忽

康熙十八年九月十一日

檄副將郭奇遊擊焦國巡

爲飛報大捷事本月初一日准 總督部院姚 咨開案據興泉道報稱攻克東石大捷緣由前來業已啓報

親王併咨商貴將軍察照在案但東石地形險要自應設寨撥兵防守議於東石左右各立四寨共成九寨互相聯絡業經行令中軍副將王英帶精兵一千四百名馬兵二百名前往東石督令貴標遊擊焦國巡邵武副將郭奇併叅將韓元朗隨征副將陳明叅將

李雲許玉守備陳維屏浙江守備劉澤深城守叅將
 傅成其帶領官兵三千餘名前往防守復行飛檄王
 副將興泉道會商築寨去後但本部院出於遲度尚
 恐未及周知貴將軍去年曾經親履其地應請貴將
 軍勝筭示覆遵行并酌撥何標官兵添防東石希為
 迅覆施行等因計粘單一摺到本將軍准此案照先

准

總督部院
寧海將軍

咨開前事業經本將軍檄行該

副

將遵照撥發官兵前往東石會同各營聯絡劄營固
 守去後今復准咨開前因合再行知為此稟仰該

將照依原行事理即將原防

前埔
靈水

官兵一千名內酌

畱三百名仍着能幹千總一員帶領巡防本寨其餘

七百名該

副將
將

盡數帶領前赴東石左壁角各劄一

營修寨駐防聯絡各標官兵犄角聲援共相保固以
 壯邊陲其附近白沙各處仍酌撥官兵加謹瞭探如
 遇有警立即奮勇協力夾剿該 副將
將身在地地方務須
 相度險易情形殫心巡防分佈得宜毋稍疎畧致干
 功令未便速速

康熙十八年十月初二日

檄督標王副將

爲軍務事照得同安衝要業經會委該副將署理同
安鎮務具疏保

題實授在案近因東石逆穴被我官兵攻取險要旣得
必須謀勇威望之員相機彈壓是以特遣該副將馳
赴料理今已會商派撥官兵分守東石各寨似可無
慮但查同安一縣城池倉庫以及邊海各汛皆極巖
險統率隄備寔難刻緩茲本將軍面商 總督部院
卽撤該副將速回同安署理鎮務以資統轄合行飛

平陽縣志 卷之十一 九
調爲此票仰該副將照依事理卽將東石汛防并修築寨垣事務交與邵武副將郭奇等統領料理該副將星刻回同保固邊防毋得刻遲速速

康熙十八年十月初五日

檄委戎旗楊把總

爲軍務事照得閩海逆氛未靖現在統師進剿自應專委紅旗督陣以鼓勇敢以整戎行查得楊春啓武藝超羣膽畧素著合行專委爲此牌仰本官照依事理卽以把總職銜管理紅旗事務如遇征剿之時務要督率各兵奮勇先登衝鋒破敵擒斬賊魁以膺重賞不許臨陣畏縮以挫軍威若我兵離賊尙遠中有畏懼不前者卽行挿箭以徇如與賊交鋒敢有遲後不進者立卽斬首示衆本官受茲督陣紅旗責任務

須秉公率衆以嚴紀律如或瞻徇玩忽一經本將軍
察出定將本官立按軍法梟示斷不輕貸慎之勉之

康熙十八年十月二十二日

檄漳州江東等各營

爲嚴飭押解逃人逃兵之法以杜擾害以安民生事
照得各旗逃人與各營逃兵皆身犯法紀例有應得
罪名旣經緝獲則長解之原差與沿途汛防護解官
兵自當照例鎖肘以防遞逸以免貽累歷有成規乃
邇來訪聞沿途押解逃人漫無拘束聽其逍遙道上
遇有單身孤客輒搶奪其衣服銀錢至於各標營護
解逃兵者因見逃人攫取橫行莫敢誰何遂乃尤而
效之以逃兵而冒名逃人沿途搜搶需索肆行無忌

以致道傍經紀小民一聞逃人將至相率驚走幾於
 避寇而異鄉旅客裹足戒心揆厥所由皆因長解原
 差及押護官兵利其所得可以分肥故鬆其肘鎖縱
 之搶掠卽有被害之人情急喊救若輩反從傍呵叱
 扶同作祟坐使此風日長必至孔道人稀合急嚴行
 禁飭爲此票仰該副將將照依事理卽便轉飭所轄
汛防弁目嗣後遇有長解押解逃人逃兵差使務須
 照例鎖肘加謹押護不得徇私賣法縱其擾害孤客
 小民分贓濟惡敢有故違一經本將軍訪聞或被舉
 首告發定將該汛弁目鎖拿責革兵役處死本將軍
 令在必行各宜凜遵慎毋玩忽

康熙十八年十月二十五日

傲泉州城守傅叅將

爲詳明案照以安兵心事本月初二日准 一切江提
督常 咨開康熙十八年十月初二日准貴州軍咨
開前事爲照叅將傅成隨帶家丁五十二名叅據該
將於赴任時開除明白隨詳報於泉州城守營補糧
業經本將軍批准起支在案茲浙江遊擊蔣明棻詳
請帶閩隨丁有不願在閩逃回原籍者毋許傅叅將
移文跟緝又將現在泉州隨丁呈請歸標併行文拘
禁家屬監比等因則是傅叅將所帶隨丁脫逃者既

不容其查緝而現在者又行拿回蔣明棐之過分彼此似覺多生一番枝節且目下閩海未平凡各營將領無不欲收集舊人以資臂指若任已偏執豈戮力同心共事疆場之誼今據前情合就咨達爲此備咨請煩察照祈念封疆大計浙閩總屬一體檄行道府將叅將傅成所帶隨丁原逃者查緝來閩現在泉營者勿行拘禁家屬庶逃風可戢而隨任健丁得以安心征剿矣仍祈示覆等因到提督准此爲照照武將軍提督楊 咨開浙標遊擊蔣明棐等帶閩兵丁有不願在閩逃回原籍者毋許傅叅將移文跟緝又將現在泉州隨丁呈請歸標併行文拘禁家屬監比等因前來細繹文內未有逃回及在泉各隨丁姓名况傅叅將又係白溫援閩

題補泉州之官除咨 溫鎮就近查其姓名住址移行溫寧紹道府將泉州叅將傅成所帶隨丁原逃者查緝赴閩現在泉營者勿行拘禁家屬外擬合咨覆爲此合咨貴將軍煩請查照施行等因到本將軍准此案照先據該將呈請所帶隨丁脫逃者准查緝來閩

現在泉營者勿行拘禁家屬等情業經本將軍移咨

浙江督院去後續准 浙督咨覆已行查緝免拘等

因先經本將軍檄行該將遵照外今復准 浙提常

咨覆前因合再行知為此票仰該將照依先今事

理傳諭現在泉營各兵安心操防不必更懷內顧可

也毋違

康熙十八年十一月初五日

檄同安朱副將

為稟報事據該副將報據探兵報稱廈門賊船俱弔

在港誠恐早晚侵犯又稱廈門整船數百號賊眾在

船而泗洲高崎各處添賊甚多每賊帶草一束請乞

迅發馬步官兵到同添防等情又據署同安鎮王副

將稟同前事等因各到本將軍據此照得同安一汛

逼近廈門逆島誠為可慮照據前情除即移商 總

督部院移咨 寧海 平南 二將軍撥發滿騎馳赴添防并

移同安鎮加謹堵防外擬合行飭為此票仰該副將

照依事理立即嚴飭在汛官兵毋分晝夜小心探防如遇有警務要聯絡上下鄰汛官兵奮勇合力擊殺淨盡該副將身在地方尤當大展才猷設奇制勝以絕逆孽窺伺鞏固邊疆其槩船亦須用心照應毋得稍有疎忽未便慎之速速

康熙十八年十一月初六日

檄鎮標鄒國棟

爲嚴飭事照得本將軍欽承

簡命提調全閩凡各鎮協營官兵馬匹糧餉收除起支并地方戰守軍機事宜皆有稽核調遣之責從來各營俱遵循定例或由總鎮咨明或由營將呈詳候奪其按季應支糧餉先造冊領咨送本將軍以憑核明挂號咨送總督部院挂發久有成規惟該鎮標三營自來收除兵馬支領糧餉總鎮既不移明諸將亦不詳報致該營官兵馬匹實在缺額及錢糧之有無清

楚本將軍竟無從稽考甚至地方盜案以及

欽件 部件通行亦無一字報聞在 總鎮吳 新蒞

閩疆或未悉定例其各營將備多有舊員舊役竟不稟請總鎮遵循成規或總鎮諭令該將等不須詳報即抑係該將等稟請不必咨明即今當軍政屆期豈該營各將弁賢否亦應不由本將軍考核惟聽該將等自相獎譽即該將等玩忽成規蔑視憲體莫此爲甚合行嚴飭爲此票仰該將照依事理即將該營兵馬錢糧地方戰守機宜以及大小將弁之賢否務要遵循成例逐一詳報候奪如再抗違除將經識鎖拿重究外該將等定以違玩軍機飛章叅處決不輕貸慎之速速

康熙十八年十一月初七日

檄行李英

爲飛報軍機事本月初五日據該將呈稱奉令統領官兵由曹墩一路訂期夾擊因投誠衆多亟須彈壓以防意外俟撫事稍暇即便親統官兵會剿除京口營官兵一百名已經調回浦城外其楓嶺營官兵二百名請暫留以資會剿等情到本將軍據此照得鄰寇流突焚劫擾我殘黎該將剿撫兼施調度合宜本將軍甚爲嘉悅今據前情除卽飛檄楓嶺營遊擊倪文陞仍將該營官兵二百名暫留崇安聽該將調遣

會剿外合行知照爲此票仰該將照依事理立即帶領各營官兵星馳曹墩一路堵擊江楊二逆仍須呈報 宣義將軍尚 請示會師直搗逆穴該將務宜督率官兵奮勇攻殺掃平積寇以安地方事平之日本將軍自當特疏具

題優叙以酬勞績毋得偷安玩忽致負委任至意勉之毋忽

康熙十八年十一月初八日

檄洛陽營遊擊趙雲

爲查取沿邊汛防界址等事案據該將呈繳該營汛轄地圖內稱上白石任起與惠安營馬山鄉接壤其內地大路則白石船鄉爲界計至洛陽汛一十里等情到本將軍據此照得查取地圖正要分別各汛管轄以專責成以杜日後推卸之弊該將等應卽會同上下鄰汛各將領勘明里數詳定分轄界址會勘的實呈報方無差悞頃據惠安營叅將魏自祿詳報管轄自惠邑起至嶺頭亭下石橋止白石橋至洛陽橋

十有四里係洛陽營管轄今據該將呈報管轄則稱白石船鄉止查石船鄉至石橋尚有四里之遙竟未開明係屬何營所轄該將既定以石船鄉爲界何不
會同魏叅將亦照界址管轄何故所報互異以開日後推卸之端殊屬疎忽合行駁查爲此票仰該將照依事理立即查明該營管轄係以石橋爲界或以石船鄉爲界呈速移會惠安營公議明確仍將山谷各鄉村地名詳晰開報具文呈覆以憑稽考毋得仍前朦混互相推卸致干查詰未便速速

康熙十八年十一月十八日

檄標左營

爲稟報事據惠安營叅將魏自祿呈稱奉本將軍批
據該將詳前事遵行聞續准署提標左營遊擊事守
備丁世芳手本移據張治張三星乞移弔伊妻周氏
楊氏母子賞賜領回完聚併保人李尾一齊釋放等
因卑職未敢擅便理合詳請憲示等情到本將軍據
此照得僞官兵既經投誠凡其妻子眷口例應給還
完聚但查周氏楊氏原在黃崎灣被惠安營官兵擒
拿審有口供係張三張富之妻並未供有張治名字

妻供夫名斷無錯悞雖稱伊夫係左營舊兵今左營
投回舊兵乃張治張三並非張富其名字固已不符
矣再查洛陽營遊擊趙雲彙報投誠文內只有林治
林三並無張治張三其姓氏又屬不符至該備詳文
內稱張治張三於十月二十三日投見洛陽營及查
洛陽營報文內又云十月二十四日林治林三投誠
到營其日期之先後又復不符再查該備詳文內稱
治等被僞斗宿鎮脅拿下海配船而洛陽營文內又
開僞斗宿中營左翼將林光勝帶僞兵林治林勝等
投誠是在海爲僞兵時分隸亦復不符及查惠安營
原報內開據李尾供楊氏丈夫張三現在海賊王一
鵬處做翼將是僞兵之與僞將尊卑又甚不符况周
氏楊氏業經奉 督部院批賞有功官兵因兩婦年
逾五十無兵肯領故發交投誠官看管今查該備詳
文內開張三年三十九歲張治年四十二歲則二兵
之年歲與周氏楊氏老壯又復不符似此種種矛盾
安知張富等前既可托地充張孝等爲之冒領出脫
焉知今日不又賄囑張治等爲之冒認希圖領出完

聚耶且該備不卽具詳本將軍請示又不查明前後情節有無確據乃徑自移文弔取賊眷殊屬玩忽今據前情除將原詳抄粘外擬合行查爲此票仰該備照依事理卽查投誠舊兵張治張三其姓名年歲與投誠之日期并在海之爲僞官僞兵何以前後供吐詳報互異若此逐一確查明白并查周氏楊氏是否的係張三張治之妻有何確據何以年歲各不相當此中有無冒認情弊詳查明確該備仍備具領狀并兵丁張三張治解赴軍前以憑察奪不得玩忽支飾致冒認之奸計得行該備自干重譴未便速速

康熙十八年十一月二十八日

檄沿邊各協營

爲透越之禁綦嚴溷拿之弊宜杜合亟申飭以肅法紀以蘇殘黎事照得沿海邊疆奉

旨畫界清野所以杜勾通而遏奸宄嚴接濟而絕盜糧也率土居民自應仰遵

功令詎有一種奸民走險如鶩愍不畏死越界通販使逆孽得以苟延是以本將軍通飭沿邊各汛防官兵晝夜勤加巡緝務使透越絕跡接濟無從久經申禁在案近本將軍又咨請督兩院嚴飭力行保甲等事

內一欸有拿獲越界之奸有司審係某甲某戶人氏
將本犯照例治罪保長與鄰里眷屬皆分別從重究
處等因復經 兩院轉行司道府廳縣遵行在案但
重犯自宜擒解而良善不容濶拿如弁兵盤獲越界
人犯必須獲有海外貨物并內地出產貨物在界外
地方盤獲及夥衆持械拒敵等情然後弁兵之巡拿
爲有功奸民始肯俯首服罪前此各營非無盤獲奸
民者必貨確犯真道府審實正法乃爲不負巡緝之
責其有藐法弃目以巡界爲美差視鄉愚爲奇貨輒
助以勦速成事關地方利弊該縣諒應加意毋爲緩
視可也

康熙十九年二月十二日

檄原同安副將

爲瀝陳失城緣由等事本月十六日准 總督部院
姚 咨開准貴將軍咨開據原署同安城守左營遊
擊王大有呈同前事等情到將軍據此爲照同安一
邑逼近廈門逆穴舊年六月間海逆困陷澄邑之後
遂率夥數萬分犯同安泉州當時人心洶洶兵無鬪
志兼以同安彈丸殘破之餘兵力旣單糧無粒儲該
副將猶欲爲以少擊衆之計率兵出城掩擊詎料城
內叛弁施琦等竟爾獻城從逆矣斯時斯景該副將

等雖欲捐軀効命保全疆土無如衆心已散獨力難支其情似在可原及該副將等自同往泉值逆魁劉國軒率夥攻圍郡城該副將等沿途鏖戰屢次立功又協力同守泉城俱經塘報

題叙在案續復隨師恢復同安茲追論失守之罪該副將等固屬難辭然細查當日失守情事寔有可原及案據同守泉城之功似猶可贖今據該將等援引海澄寬宥之

赦呈請

題諮前來相應咨請貴部院俯念當時兵心已散糧食匱乏情形與其後固守泉城勞績詳序會

題准其抵贖庶邊疆將士知所激勸爭相奮勵於將來矣合咨察照酌奪會

題施行等因到部院准此爲照同安接壤漳泉對峙逆島舊年六月海澄陷後同邑因以孤危彼時海逆數萬副將馮昭京等出城掩殺勢難以少擊衆又有內叛施琦等開門納賊則同安之淪陷罪似可原至若城守左營遊擊王大有係屬副將馮昭京調度之員

先時出防灌口事急馳援不及情尤可宥且後來衝鋒血戰協守泉郡隨師恢復同安該副將等均著勞績錄其功以贖其罪是亦激勸征剿之一端也茲准大咨除卽備移 撫院酌奪會

題候覆到日另移外相應咨覆請煩察照施行等因到本將軍准此案據該副將等各呈叙失陷同安縣城情由業經本將軍咨達 總督部院會

題去後今准前因合行遵照爲此票仰該副將照依事理卽便轉行原左營遊擊王大有一體知照可也

康熙十八年十二月十九日

檄福清營

爲稟報事正月初六日准 興化總鎮劉 咨開據
該將報稱有奸民郭勳八等越界採捕破招撫人役
拿獲并海魚一小擔等因同日又據該將報稱前由
各到本將軍據此照得遷邊盡界設兵巡防正以杜
內奸而遏外寇巡緝官兵務必嚴加稽察不許一人
偷越屢經本將軍告誡申嚴不啻頑禿據報前項奸
民郭勳八等越界採捕現被招撫人役拿獲不知該
汛口兵所司何事旣不能防範於前復不能緝獲於

後疎畧玩忽莫此爲甚合行提究爲此票仰該將照依事理立將該汛防守弁兵鎖解軍前以憑懲究以儆將來仍嚴飭沿邊汛防各弁員多方巡緝嚴加稽察不得稍有疎畧致干

功令慎之速速

康熙十九年正月初九日

檄本標及援剿各營

爲嚴禁賭博以固兵心以肅營規事照得營兵月給一分糧餉當此米薪騰貴衣食尙慮不充何堪賭博花費近據各營將領呈報兵丁脫逃甚多皆因無良之夥或引誘賭博或放頭寫糧以致一經賭輸日食難度勢必無奈逃亡此皆該管弁員平日不行覺察約束不嚴所致合亟嚴禁爲此票仰該將照依事理卽便轉飭所轄各弁員嚴加察訪如營中有等不肖兵丁不遵紀律引誘賭博及放頭寫糧者治以軍法

如本管弁目稽察不嚴以致營兵賭輸脫逃察出
併重懲該將以約束不嚴并行叅處不貸

康熙十九年正月二十五日

檄邵武各營

爲咨訂師期事本月初七日准 水師提督萬 咨
開爲照逆賊船隻厚集海壇所有進取機宜業經咨
商詳晰矣今本提督的於本月初四日出定海出師
分兵夾攻務期制勝但圍頭乃賊艘上下寄泊之澳
所關最爲要緊須實得精銳陸兵先據其地安設火
砲堵截夾擊非與他澳虛張聲援者可比茲屆師期
合再咨訂爲此合咨貴將軍請煩察照迅調施行等
因到本將軍准此案照先准 水師提督萬 咨開

撥發官兵先於圍頭分布堵擊上下逆艘等因業經本將軍移咨 同安鎮多撥精兵擡運大砲着令能將帶領前赴圍頭附近處所屯營并檄行該副將俟同安官兵到日與之相爲犄角聲援合力堵剿仍候示進屯圍頭堵擊逆艘并經咨會 督部院及咨覆水師提督知照外今准咨訂師期前來除再飛催同安鎮速撥官兵星赴該汛會合該副將等官兵作速進據圍頭去後合亟行知爲此票仰該副將照依事理立將在汛官兵挑選齊備俟同安官兵到汛之日該副將等卽會議應留寨汛者嚴飭晝夜用心防守寨城其應帶出戰者該副將卽親自帶領務要帶砲火會同同安官兵進據圍頭要口屯營相機堵擊逆艘不許上下往來灣泊事關緊要軍機該副將等務要奮勇立功毋得稍有退縮疎畧自干軍令未便至於行間一切機宜及賊勢情形各該將等皆老成歷練務須細加審察酌量地方險易緩急隨機應變會商調撥兵馬夾擊用心聯絡以保萬全不得偏見膠執慎之勉之

康熙十九年二月初八日

檄漳浦縣

爲懇恩再培縣脈樹德官民事據漳浦縣鄉紳林琛
黃性震陳天遠舉人藍陳畧陳炳林登虎生員黃台
佐蔡邁廣丘士錚里民郭春洪正等僉呈稱浦邑自
昔人文甲上郡丁糧冠十城良以梁峯拱秀吉水朝
宗自赤檜中流由雙溪而遠衛縣治以護城隍地利
居於全盛也至戊子年洪水崩陷溪港多岐赤檜雙
溪水違故道本邑由是丁糧日減文物衰替幸將軍
大老爺前任駐節浦邑檄發梅林保人民鳩衆召工

修築河堤官民利賴茲數年以來水濫雙溪堤開四
潰士民咸受其害今欲使吉水仍朝本縣費用浩繁
別召工匠又多生疎難以計日報竣伏惟將軍大老
爺恩施浦邑雞犬桑麻蒙休者數萬戶春秋俎豆戴
德者數十年今值節鉞再臨之日乃恩波復造之時
彈壓全省獨切一方琛等相率匍呈叩乞痼瘵舊治
始終栽植查照往例仍着附近梅林保人民自備苦
找木料工匠竭力堅築以一保而培一縣之地脉相
應暫免該保徭役一年以均勞逸伏乞行縣示准起
工庶凋殘可起富盛可期合邑士民咸荷慈恩於無
既矣等情到本將軍據此爲照漳浦城外赤檜雙溪
之水實爲該縣治之脉絡向因亂後隄防崩潰水不
朝護城郭而閭閻日敝人文之氣中衰本將軍於順
治年間援剿入閩駐節該邑此時城垣倒塌里巷丘
墟本將軍相度城垣舊址檄行有司庀材修築不數
月而工竣人民復集因詢及紳衿耆老知水脉枯涸
乃倡議修導而該縣之戶口丁糧人文甲第幾復其
舊經今二十四載矣年來海道播亂水隄再決茲據

紳士里民僉呈重修猶恐工程浩大請暫免梅林保
 徭役一年俾該保人民就近自備工料修築以固河
 隄以通水脉等情前來該縣留心民社造福地方諒
 有同心今據前情合行遵照為此票仰該縣官吏照
 依事理即將該縣城外赤檜雙溪水隄查明原址着
 令梅林保居民自備木料工匠速行修築完固以全
 朝宗舊蹟以阜戶口人文併將該保徭役暫行酌免
 一年以紓民力此係通邑風水所關若工程浩大該
 保獨力難肩該縣仍須酌量着令附近保民共相幫
 以透越誣陷遇有真正接濟奸民違望官兵棄貨潛
 逃而界內獨行之人反或被執指為奸民希圖詐騙
 不從則鎖解官府及至辯訴昭雪殘黎被害已無窮
 矣合亟嚴飭為此票仰該副將照依事理即便轉飭
 所屬防邊各弁日務要勤慎巡防杜絕接濟遇有真
 正奸民私行透越人貨確實者立即擒拿通報以憑
 批發審究照例正法敢有貪利賄縱及因循偷安失
 察者事發之日亦定行照例究處但不許縱容弁兵
 將界內行走居民假公捏詞濶拿詐嚇以致殘黎無

辜受害如有故違審虛之日除將詐陷兵目盡法處
死外該管千把網責斥革將備以故縱兵丁嚇詐之
例飛章叅處決不輕貸仍取具各遵依回報存查慎
之毋忽

康熙十八年十二月十四日

檄遊擊何勇

爲飭剿逆孽早靖地方事照得江楊二逆依山爲險
荼毒居民罪不容誅及官兵進剿又復借言就撫仍
肆劫掠甚至樹旗練兵逼民入夥若不乘時撲滅勢
必燎原屢據各協營塘報狡賊情形業經本將軍咨
會督兩院併檄行各該營合力進剿務絕根株各
在案本將軍已久悉逆孽狡謀惟欲速加斧鉞早靖
地方乃該將等毫無見識屢聽狡計自爲觀望顧此
慮彼今日旣商進兵明日又稱堵禦遷延時日竟未

進剿既任專郡城守之責不知所司何事輒云恐壞撫局致墮奸計又云衆寡堪慮自挫兵威一味畏怯偷安支辭塞責恐

功令森嚴不能爲該將寬也茲准 宣義將軍尚 咨開
已親統全師前往邵光各汛合兵剿賊等因該將等務宜星速會合諸路官兵奮勇爭先協力進剿以殲賊黨方稱厥職合行飭剿爲此票仰該將照依先今事理立即星移各協官兵堵扼要口尅期並進分頭攻剿務須翦除積寇早奏膚功毋得再爲觀望因循懈弛致干軍令仍將合兵進剿情形不時具報以憑察奪慎速慎速

康熙十九年四月初四日

檄隨征總兵吳桂

爲飛報克取廈門逆島事照得本將軍於本月二十七日統領官兵進取廈門逆島獲勝情形業經具疏題報在案所有在事大小各官有功職名履歷合行查取以憑彙冊咨

題議叙爲此票仰該總兵照依事理卽將當日跟隨本將軍進取廈門逆島所轄大小弁員果係在事各官職名履歷并移知總兵羅士鈐吳天祿等所轄有功各將弁一起彙造履歷功冊卽刻星馳呈送本將軍

二周紀
卷之十一
三
轅門立等核明彙冊咨 部

題叙毋得以事外弁員溷行造入致干往返駁造遲延
未便火速火速

康熙十九年四月二十二日

檄副將郭奇

為肅清逆巢事五月二十七日據該副將呈稱有二
十九都鄉民報有逆賊餘黨數百在江西廣信府貴
溪縣五十四都居庸何家復據五十四都鄉民何道
行來報有高招大蠹二桿等情轉呈到本將軍據此
照得逆賊流毒害民遠近地方被害已極今江楊二
渠已經悔罪歸誠其餘黨數百人竄伏於廣信貴溪
縣之五十四都居庸何家地方樹旗屯聚若不亟行
剿捕恐日漸滋蔓貽患地方今據前情除移咨

督撫

兩院暨 江西

撫院 督院 提督

檄行各該協營迅行剿捕外

合行飭剿為此票仰該副將照依事理立即撥發精健官兵前往江閩交界近賊處所堵截隘口如江西官兵剿賊之日恐有餘孽奔逃竄入閩地該副將即嚴督官兵合力夾擊斬殺淨盡務絕根株以靖地方勿令一賊兔脫貽患將來該副將身在地方務須相機剿禦毋得稍有懈怠致干

功令大有未便仍將堵剿情形不時具報查考毋違速速
康熙十九年六月初一日

照會興泉道

為修葺城垣鼓樓疏通街衢水道以固金湯以興文運事照得泉州一郡形勝甲於天南人文蔚起城垣堅固樓閣巋然誠為海表之雄鎮自變亂而後繼以海逆竊踞地利水道久廢不修以致風俗日益凋敝士民日就蕭條迨恢復以來軍興旁午在有司方催夫徵餉簿書期會之不遑奚暇修復舊觀在本將軍提師勦賊馬足未停何自講求遺蹟茲逆島平定海宇風清願與士民修廢舉墮共圖振興昨查閱城垣

見塚堞頽壞敵樓傾圯不堪矚目當此寇孽奔竄之時若不亟加修葺殊非所以重形勢而固根本况氣象頽圯亦非漸復太平景象再查城內東西南北四處原各設有鼓樓昔人建造皆按地理其有關於闔郡風水可知今倒塌者則殘石擁塞通衢破損者則椽瓦不蔽風雨更兼街中水道不通每遇天雨淤泥壅積竟至水深數尺舖戶居民臨流愁歎不特行走不便亦多重腿疾病之虞且水道壅遏則文運不興所關尤爲不小本將軍駐節茲土幸與 貴道共事

一方旣與斯民掃除寇虐尤不可不爲地方修葺規模除南街鼓樓基址本將軍捐俸現差員役督修其樓屋俟另會議興葢外至於城塚敵樓街衢水道以及東西鼓樓亟應乘時次第修葢疏通以固金湯以興文運業經面商合再照知爲此照會 貴道煩爲查照希卽檄行該府縣將郡城塚堞併城上敵樓從長酌議或應動支何項錢糧或應公派何縣協助作速興工修理其城中鼓樓水道街衢亦關係闔郡文運民居風水仍希 貴道併行府縣酌議傳請在城

縉紳士夫訂期會集明倫堂以便本將軍親臨公同酌議次第興修使海疆重地煥然改觀嗣此人文蔚起物阜民康亦不失 貴道與本將軍撫馭斯邦作興振起之至意也仍希迅覆施行

康熙十九年閏八月初五日

檄邵武副將郭奇

爲酌派汛防以固疆圉事本月十七日准 江西提督許 咨開康熙十九年閏八月准貴將軍咨開希仰檄行該汛防將領查明凡係江閩接壤之區逆賊舊踞老巢務要撥發官兵防守稽查俟地方安妥人心稍定撤回前項官兵則賊藪可蒐疆圉永固矣仍祈將安設過官兵緣由賜覆以便行營遵照施行等因到本提督准此爲照江閩接壤山深谷邃易於藏奸兩界殘黎向遭荼毒業經會師剿撫地方稍稱寧

謐但恐有鷹眼未化之徒心懷叵測所當預為隄防
 今准台咨誠為固圉至計除經行令瀘溪縣千總蘇
 鳳派撥官兵於鐵牛關一帶要路駐劄防禦又經移
 咨撫建廣總鎮陳 酌撥官兵於江閩接壤雲際火
 燒各關相度險要處所分布安設嚴加防範以遏盜
 萌凡逆賊舊踞空巢仍不時撥發官兵前去稽查俟
 地方寧謐酌量撤回外庶彼此封疆均獲安堵無非
 仰藉貴將軍寧謐之福也合就咨覆等因到本將軍
 准此案照先據該副將呈詳前事內稱轉籲憲恩賜
 咨 江西 撫嚴飭鉛山等處防官所轄凡有接連閩
 界地方一體安設汛防官兵互相堵禦等情隨經本
 將軍移咨 督部院察照并咨 江西 撫查照凡經
 江閩交界接壤之處務祈撥發官兵防守稽查等因
 去後續准 總督部院覆咨前因業經本將軍檄行
 該副將知照在案今准 江西提督許 咨覆前因
 合再行知為此票仰該副將照依先今事理今江界
 之雲際火燒鐵牛等關既經江省派撥官兵分布防
 守則剿禦不患無資該副將仍嚴飭各汛防要口弁

目小心稽察嚴加隄備稍有警息卽會合鄰省官兵
協力撲剿以固疆圉以靖地方毋得稍有懈怠致干
功令未便速速

康熙十九年九月二十日

差提弁犯李枝華等

爲差提事案據德化縣密稟把總李枝華婪贓害民
等緣由業經本將軍檄行中軍馬叅將會同左營朱
遊擊後營劉遊擊卽將犯弁李枝華案內有名犯証
速拘研審詳報去後續據該叅將呈准該縣移稱隨
卽分差嚴拘去後查李仕一名先經逃走未獲其餘
各犯証住居星散一時難以俱齊俟各犯証到齊另
文差解送審等因詳覆到本將軍據此照得把總李
枝華出防汛地婪贓害民旣據該縣密稟鑿鑿則案

內有名犯証該縣卽應預先嚴拘齊到移解前來以憑中軍馬叅將等會同逐款研審的實詳報定奪何得又稱李仕在逃未獲其餘各犯証星散難齊該縣爲一邑之令申稟汎卉爲安民起見其案內犯証皆該縣管轄百姓自應立呼立應何得以星散塞責故意藐玩豈視本將軍法紀爲兒戲耶顯屬藐抗合行差提爲此票仰差役照依事理卽便前往德化縣着落該縣官吏立將李枝華案內李仕徐仲範陳啓泰鄭顏陳爾志郭世良鄭觀藩章巽六謝霓章賓張其羽林士隆郭維采陳御乾林伯扶徐修畧王斌全陳愷雲許振許錫袞并案內有名賊犯各鄉社証佐星速拘齊提解前來以憑發審詳解定奪如再遲延抗拒卽將該縣經承提究去差毋得生事賄縱致干查究未便速速

康熙十九年九月二十七日

檄黃副將

爲稟報事案據該副將呈詳兵丁林繼隆往小樟取討其妻財禮被小舅謝一篇同後夫黃外華於六月十九日殺死在小樟屋後其屍至晚擡去放火焚燒等情隨經本將軍批行該副將確查的實并抄有司供看呈報等因去後延今日久未據呈覆草菅人命藐玩憲批殊干法紀本應提究經識姑再飭催爲此崇仰該副將照依先今事理立即查明兵丁林繼隆被謝一篇黃外華等殺死一案曾否提拘兇犯作何

審擬究償其中果有何項隱情白日殺命當晚焚屍
地方鄰佑何無救報是何情弊逐一確查限文到三
日內據實備晰呈覆以憑察奪如再遲玩卽差夜役
先將該副將經管字識鎖拿轅門究處該營將弁定
行指叅該副將鈐束不嚴大有未便速速

康熙十九年九月二十七日

檄遊擊焦國巡

爲嚴拿事照得沿海地方奉

旨照舊嚴禁不許寸板透越屢經本將軍飭行遵照巡緝
在案近訪聞惠安所屬界外港口有大膽奸民楊東
等擅造有篷梳船隻多至四五十號名爲出海捕魚
實係希圖透越接濟作奸違禁大干法紀除檄行該
汛防將弁查緝外擬合專差嚴拿爲此票仰該將照
依事理卽便前往惠安縣所屬沿海一帶地方查將
前項奸民楊東等所造船隻連人盡行拘拿解赴轅

門以憑訊明發落毋得受私賄縱致干查究未便速
速

康熙十九年十月二十九日

檄行沿邊各協營

爲申嚴備禦以固邊防事照得海逆雖已敗逃巨魁
尚未授首近據投誠人員口供并據偵探兵役回報
俱稱逆首劉國軒復聚船八九十隻灣泊澎湖乘此
歲暮隆冬希圖侵掠沿海居民等情查閩省當兵荒
之餘殘黎困苦已極兼值隆冬歲逼窮民饑寒切膚
恐有無賴奸棍煽誘圖利走險勾通逆賊從而知我
內地虛實聚艘侵犯關係匪小亟當先時隄備庶免
臨事周章合行申嚴備禦爲此票仰該副將照依事

理即便嚴飭所轄沿邊汛防各弁日務要早晚勤慎
瞭探加謹隄備仍知會鄰汛官兵彼此互相聯絡遇
有警息一面協力夾擊一面飛報各鎮協營發兵應
援并於各要口嚴加巡緝以杜奸民透越勾通至於
各該營兵丁尤須選練精壯不得容留老弱充數及
隱佔虛冒以致營伍空虛難資實用再將各該營官
兵挑出勇敢慣戰者數百名常川操練務令技藝精
熟以備有事各該將親自帶領飛馳應援撲剿事關
邊防大計本將軍雖叨奉

特旨復任江南現在候代然在任一日當盡二日之綢繆
除分差員役前往各處察訪外該協將各宜殫心備
禦時常專差精細健兵密行查訪逆艘動靜并官兵
果否勤慎情形庶汛防弁日知所儆惕用心隄備不
敢懈弛

功令森嚴該協將等功名身命所關各自愛惜毋得玩忽
取咎仍具題依報查毋違速

康熙十九年十一月十四日

檄行建寧康副將

爲恩賜帛給以全骨肉事本年十一月十五日准

浙江總督部院李 咨開前事等因到本將軍准此

除將原文抄黏外爲照出征官兵不許擄掠難民子女卽得自賊營亦准民間認領屢奉 嚴諭炳若星

日久經通行在案乃遊擊馬登瀛所捉永嘉縣難女妹兒旣經 浙江總督部院批查的確着令伊兄赴浦認領初則以其所領非親推托繼以旣配爲辭且捏援旗下取贖之例勒索高價明係執留故意措勒

真目無三尺者矣本應卽行叅處但念該將奉公外出合行飭查爲此票仰該副將照依事理立將前項永嘉縣難女妹兒清追出署專差誠懇的役伴送解赴浙江總督部院李軍前以憑轉發伊父母領回完聚去差仍取領送到批廻呈報查考毋得因循遲延致干扶同之咎未便立速立速

康熙十九年十一月十八日

檄行汀州等營

爲嚴飭探剿以杜亂萌事照得

汀州漳浦雲霄詔安

往西一帶

皆深山邃谷夙爲宵小亡命藏匿之藪際此海逆餘魂尚未盡殄若內地奸宄肅清外寇自無隙可乘近因沙汰投誠兵丁本將軍訪聞有等無家可歸之衆皆嘯聚山谷互相煽誘希圖剽劫倘不及時躡探剿捕勢必漸成滋蔓恐海逆聞風艤舟侵犯內外勾連騷動地方所關非小合亟飭行探剿爲此票仰該副將將照依事理文到立刻選撥伶俐能幹兵丁十餘名

俱作鄉民打扮分頭前往所轄山間各村庄密行躡探果否有沙汰投誠官兵及宵小潛藏哨聚賊黨約有若干併確查賊首是何姓名現今屯聚巢穴何處曾否蠢動逐一查明一面密速發兵一面具由通報所差兵役務要着令勿憚跋涉前往深山窮谷查探不許只以傳聞浮言粉飾回報虛應故事仍將撥過各兵花名報查若躡探不實嗣後賊起之日定行按名拿究際此隆冬歲暮奸宄飢寒逼身易於叢聚爲非該副將有地方之責功名性命所關尤宜嚴加稽察防範以杜亂萌若玩忽偷安致有疎失定行飛章叅處決不輕貸仍先具遵依報查各無違悞速速

康熙十九年十一月二十五日

檄泉州海防廳

爲密報事本月初九日據泉州城守叅將傅成呈稱
案奉憲行近因沙汰投誠兵丁無家可歸嘯聚深山
互相煽誘希圖不軌若不及時剿捕漸成滋蔓貽害
地方所關非小仰職卽刻選差能幹兵役扮作鄉民
分頭前往所屬各處密行躡探嘯聚賊黨約有若干
賊首是何姓名現今巢穴何處限五日內密報前來
以憑剿捕以杜亂萌等因奉此該卑職密差日兵扮
作鄉民四處偵探去後今於十二月初八日據差兵

王桂等緝到僞總兵吳勝一員僞綾劄一張圖書一方併陳福一名到職隨詢取口供在案理合解報聽候憲奪等情到本將軍據此事干謀逆除咨明總督部院外合行發審並緝爲此合劄該廳官吏照依事理卽將發去吳勝陳福併綾劄圖書會同中軍馬叅將左營朱副將泉州城守傅叅將嚴加密審除所供之外有無餘黨務要研究確實勿致奸宄漏網以滋蔓延仍先差的當員役協同營員將供內逆犯葉日高歐用果呂寬娘李興等立即密擒務獲勿令逸脫亦不得株連無辜貽害地方均有未便

康熙十九年十二月初十日

平岡紀卷之十一目錄

告示

曉諭省城

曉諭惠安

給示雙門

給示洛陽橋

曉諭興泉各屬

招撫脅從

曉諭歸業

給示溜石灣等處

給示石獅亭

給示泉州雙門

曉諭同安縣屬

曉諭長泰城門

給示漳浦縣二十八都

出示四鄉

曉諭赴閩逃兵

示小石洞

曉諭漳屬

曉諭三十六等都

示禁雙橋

給示大小盈

示泉州府

示西坑社

曉諭援閩兵丁

給各協營張掛

給示漳州

曉諭合屬士民

曉諭泉屬

分示要汛

示東豫新兵

平閩紀卷之十二

懋紹漁山

三韓楊 捷元凱著 男懋緒令鴻纂

懋繪今掌

告示

曉諭省城

為曉諭事照得鄭逆父子濟惡擄掠為生致沿海居民流離顛沛罪大惡極天人共怒不知悔禍尚敢煽誘亡命擾我漳泉茲本軍門欽承

特簡提督全閩現在統率江南驍勇久戰雄兵併敬奉

親王方畧調集鎮營官兵共矢同讐之憤大張撻伐之
威誠恐爾等士民心懷風鶴致失安生合行出示曉
諭爲此示諭遠近紳衿士民人等知悉本軍門前曾
援剿閩地屢挫賊鋒深知賊之伎倆只在搶掠所糾
之衆真賊不過數千其餘皆係吾漳泉赤子或因變
亂之後衣食失所苟且依附或爲賊所逼脅隱忍回
面此皆烏合之衆豈足當我虎闕之雄今各路滿漢
大兵暨廣東援剿官兵已經雲集不日進剿立見賊
衆敗亡况本軍門之紀律素嚴出師正以衛民剿撫
兼施歸誠不計舊惡旌旗所向計日廓清太平可望
爾等士民各安生理勿得悞聽奸宄煽惑自失生業
可也

康熙十七年八月初八日

曉諭惠安

爲官兵恢復惠安廣示招徠以安民業事照得逆孽
鄭經竊踞海島肆惡有年惟以擄掠爲生如拆毀城
垣橋梁焚燒廟宇民居荼毒生靈蹂躪桑梓不過賊
寇故套天厭其惡指日滅亡茲本軍門欽奉

特簡提督全國軍務敬奉

親王方畧會同

分

二都統

浙江提督石

福寧總

鎮黃 統率雄師大彰捷伐逆黨聞風喪膽天兵一
到抱頭鼠竄已經恢復惠安縣城安插百姓卽當進

兵征剿諒此釜底游魂亡可立待但哀我赤子室廬
被其焚燬資財被其搶掠併有迫脅下海以致父母
妻子不能完聚本軍門深切痛心合亟出示招徠爲
此示仰士民人等知悉凡因賊勢鴟張逃避遠方與
藏匿山谷者今賊已敗遁指日廓清爾等星速急回
鄉里安居復業切勿驚疑并聽信奸宄煽惑自失生
計其有被擄下海或遭迫脅身在賊營爲賊所用者
俱許悔過歸誠速赴軍前投首本軍門盡行寬宥論
令該府縣加意安插務令得所本軍門愛民心切字
字誓日矢天爾士民各宜仰體毋負惓惓至意特示

康熙十七年八月二十五日

給示雙門

爲安撫民生事照得本軍門欽膺

特簡提督全閩軍務祗緣海逆侵犯泉州被圍日久郡城之內賴有滿漢官兵固守百姓亦晝夜協防而郊外居民無不受其荼毒本軍門是以星夜統兵南征旌旗所向賊衆望風瓦解泉城獲全正爾士民其慶安集之際合宜出示安撫爲此示諭軍民人等知悉凡開張店舖者照常貿易耕種田園者及時收割如有遠避深山僻地者急速撤回免致失所其有被擄下海

并通脅在船者皆我良民赤子俱許速赴轅門投首
既准寬宥諭令該管有司加意撫綏不許地方棍徒
借端嚇害至王宰兵丁皆恪遵紀律並不滋擾民間
一草一木爾士民宜各安心樂業以副本軍門愛民
至意特示

康熙十七年八月二十五日

給示洛陽橋

爲招諭殘黎歸業事照得閩省遭變亂之後人民困
苦已極近復因海道窺犯泉州沿途擄掠慘此民生
耕者不得在田居者不得安室遂使體無完衣食不
宿飽冀免目前困苦相率遷徙窮鄉本軍門統師南
征日觀室廬傾圮田野荒蕪載道淒涼不勝傷感茲
旌旗所指逆孽克飛宵遁泉閩已解漳路疏通蕩平
之會端在指日誠恐爾等士民懷疑却顧自棄故土
生業苟且流落他方合行招諭爲此示仰遠近士民

人等知悉各宜趁此冬成之候速歸故土收穫稻穀以贍俯仰其有別業生理亦當及時歸里照常復業至於汛防官兵敢有生事騷擾科派強糴使民生不安者許爾士民據實呈訴定以軍法從事若各鎮營官兵經過該地方敢有拆毀門戶私索酒食攫取鷄犬強拿挑擔等弊許爾士民協力擒解防弁轉解本軍門究處倘防官暗徇故縱定將防官坐罪本軍門身任全閩統帥與爾士民疾苦休戚一體相關誓當振肅軍紀以奠哀鴻特申招諭早歸故業勿負許許至意可也特示

康熙十七年八月三十日

曉諭與泉各屬

爲曉諭事照得本軍門統師南征逆賊敗遁泉州之
圍已解正爾士民安生復業之時但閩省沿邊地方
依山負海盜巨寇雖避恐尚有未盡游竄或潛伏鄉
村或暗藏山麓希圖劫擄擾害殘黎官兵追捕則逃
匿無踪官兵撤回則依然嘯聚揆厥所由皆係內地
奸棍暗通線索勾引窩藏不然水面餘寇豈能畏懼
數日暗伏山陬窺伺狂逞除現在酌撥官兵於沿邊
緊要處所分布扼防并安設塘兵外合行出示曉諭

爲此示仰各鄉都市鎮士民人等知悉各宜聯絡附近寨堡鄉壯同心協力互相守禦仍與汛防官兵相爲策應聲援倘本鄉之內有行止詭秘來歷不明之人立行舉首驅除以絕內奸并時加採探如某山某路有賊夥暗伏窺伺者星速密報汛防弁員引領官兵擒剿如敢陽順陰違與賊相爲表裏及膜不相關遇警不相策應致汛防塘撥官兵及各衙門來往差官稍有疎虞定將附近各鄉村以通賊引寇從重治罪斷不姑貸本軍門二十年前曾敷歷闡疆援剿泉漳各處其於此中之民情土俗深悉無遺爾等勿謂本軍門初臨此土遂爾因循故轍以身試法也慎之毋忽

康熙十七年八月三十日

招撫脅從

爲投誠得福從逆必誅特申招撫開諭愚迷事照得
海賊鄭經逆天犯順罪惡貫盈尙不悔禍侵我泉州
茲本軍門統師捷伐旌旗一指賊已驚重喪膽抱頭
鼠竄現今滿漢官兵雲集尅期進剿立見滅亡但聞
爾等士民有先年受伊僞割甘爲鷹犬者亦有近日
被其逼脅勉爲附從者此皆不明禍福之理暗于順
逆之勢耳試思鄭經偷生海島流毒閩疆卽其擄掠
子女捉人拷餉以及剽毀城垣斷橋剝路焚燒民舍

種種故智總一盜賊伎倆爾等士民相從危濤絕島之中若爲功名則賊劄豈成官職若爲身家則海船何可安居况拋棄祖宗坟墓隔絕父母妻子生不敢還歸故鄉死竟葬于魚腹徒然殘害鄉里荼毒桑梓一遇官兵頃刻喪命甚爲可憫本軍門不忍目覩愚迷陷于死亡特廣

皇仁予以自新之路爲此示諭一應新舊脅從人等知悉但能洗心滌慮速赴本軍門投順則以前從逆之事槩置不問如願歸農者卽行府縣官給以牛種加意安插永不許追求往事若欲隨營報効官照原銜給劄量材補用兵有強壯者收伍給糧至於各偽鎮偽將有能擒斬渠魁率衆來歸者定行特疏

題請優擢本軍門素以信義待人况荷

特簡提督全省自能一力主持斷不爾負示後倘仍前執迷不悟甘心作賊官兵進剿盡行誅戮其民間有父兄子弟原在賊中敢于私行送信通同作賊者查出一體連坐立刻梟斬決不輕貸禍福兩途開示昭然各宜循省毋貽後悔特示

康熙十七年九月初二日

曉諭歸業

為再申禁戢招諭歸業事照得海賊肆虐逞圍犯泉州
凡郡城以外邑里村庄士民無不受其魚肉嚴刑索
餉則典子鬻妻恣意搶掠則焚集毀卵威逼剪辮皆
從為非種種暴橫難以備述以致殘黎難禁湯火相
率逃避深山今大兵至止賊衆敗逃本軍門業經示
禁官兵騷擾招諭吾民復業去後茲疊據各縣營文
武呈報各鄉邑難民尙爾棲止山間未盡歸里得無
以剪辮脅從恐為兵棍詐害故懷疑畏舉足踟躇耶

不知本軍門之號令素嚴旣已寬宥前愆則弁兵孰敢再生被節擾害吾民合再申諭爲此示仰遠近邑里士民人等知悉務宜作速歸家修復故業且冬成在卽五穀登場若再遲延子粒被人竊取則一家之俯仰何資况天時漸冷舊葛單衣巖棲谷處徒滋疾病本軍門駐節斯土與吾赤子休戚相關推心置腹諄切招徠至於剪辮脅從事非得已今旣投戈荷鍤盡屬良民倘有不肖弁兵及積奸巨棍敢于生端嚇詐爰私自下鄉漁獵騷擾者許卽協力擒解定按軍法重處斷不輕縱爾等其各翻然自悔安心復業勿負本軍門惓惓至意若示後仍復觀望不前明係心懷反側定以通賊拿解正法噬悔無及慎之

康熙十七年九月初二日

給示溜石灣等處

爲懇恩給示戢兵便民事據南門外溜石灣居民朱壽周盛名等呈稱壽等所居溜石一帶並係淺溪曲灣原設有小艇載渡挑販往來茲值地方平定殘黎漸次復業往來人衆仍須搭渡但因兵馬雲屯恐有地棍人等影射營頭名色生端阻撓有妨民務懇祈給示禁戢凡有挑販往來聽從民便搭渡不許地棍營兵阻撓需索俾行人不至病涉則哀鴻戴德彌深等情到本軍門據此照得泉圍甫解士民雖離兵燹

猶未登於衽席本軍門安集心懸綏和恐後凡屬便
民悉從輿論今據前情合行給示爲此示仰一切地
棍兵廝人等知悉敢有蔑視法紀在于溜石石頭一
帶渡口阻撓搭渡擾害行人者許爾灣民卽赴轅門
喊稟以憑拿究决不輕貸特示

康熙十七年九月初三日

給示石獅亭

爲懇天給示以安地方事據晉江縣十九都石獅亭
鄉民陳廷榮等稟稱延等本都寬道海寇蹂躪
民不聊生逃竄深山幸逢福足照臨統帥進剿賊寇
聞風逃竄士庶得歸故土誠恐地棍勾引兵廝生端
擾害相率卽叩恩准給示禁戢兵丁撫綏殘黎招徠
遊民以安生業等情據此照得泉民重遭寇害流離
困苦已極本軍門現在出示撫綏招諭猶恐無知兵
棍敢于生端恣肆殊非本軍門戢兵愛民至意合再

示禁爲此示仰各營兵丁并地棍人等知悉嗣後務須恪守法紀毋得擅自下鄉借端索詐驚擾哀鴻敢有不遵許該地方人等協力擒解轅門定行細責柳示斷不輕貸爾民亦宜各安生業樂享昇平毋得潛遁逆寇自貽伊感務各稟遵慎之勿忽

康熙十七年九月初六日

給示泉州雙門

爲曉諭事照得逆寇劉國軒妄肆鴟張攻圍泉州大兵一到望風鼠竄猶敢分遣奸細陳就等窺我官兵虛實天厭其惡爲城守審察將獲呈解前來業令營縣文武公訊甚真隨經本軍門咨會無院將奸細陳就一名梟示外合行曉諭爲此示仰閩郡遠近士民人等知悉務宜洗心滌慮各安素業如有奸宄潛匿該地方立即舉首擒解以憑審明發落敢有扶同容隱窩藏匪類偵探軍機暗爲線索者或被首告

或經訪聞除本犯立正典刑外其隣佑保甲俱以通賊論罪决不輕貸慎之毋忽特示

康熙十七年九月二十四日

曉諭同安縣屬

爲再申勸諭以廣

仁事照得海逆鄭經三世爲盜剽掠沿邊生靈塗炭而逆黨劉國軒以奸狡下賤甘心鷹犬攘臂助虐侵犯泉城及大兵至止敗竄漳南乃不知悔罪猶殫集餘寇希圖再逞茲本軍門會同都統喀爾喀率統滿漢雄兵南下會剿并檄調省城舟師乘風直搗廈門巢穴水陸大舉逆賊行將授首海甸清寧藉日立見近訪聞同安縣所屬人民尚有陰持兩端未盡剃髮者

若據律例則從逆謀叛俱當發兵洗蕩但本軍門軫念爾等愚蒙無知或逼威勢或迫饑寒一時不能自王悞墮局中若盡膏斧鑕恐違我

皇上好生大德姑且再申勸諭爲此示仰同安縣所屬山陬海澨各色人等知悉務速洗心滌慮剃髮歸業若經受僞職卽赴軍前投誠或願隨標卽爲

題請銜俸或願歸農卽爲安插得所不許鄉里挾讐告害倘敢再持首鼠希圖觀望及陽順陰違爲賊線索窩隱匪類乘隙劫掠害民者或經訪聞或被首告定行遣發官兵盡行剿除勿謂本軍門執法太嚴也思之慎之毋忽

康熙十七年十月初九日

曉諭長泰城門

爲嚴禁官兵騷擾以奠哀鴻事照得長泰縣先被海
逆蹂躪遂致士民逃散邑里蕭條本軍門統兵經臨
傷心蒿目雖經申諭官兵不許擅動吾民一草一木
但恐滿漢士馬雜處遵循不一合再出示嚴禁爲此
示仰所屬各鎮協營兵廝人等知悉務宜恪守紀律
敢有擅拆民房及縱放馬匹踐食五穀者許該地方
百姓協力擒解該管防官衙門細責枷示若該管防
官瞻徇庇護查出定行併處決不輕貸凡我士民作

速歸家修理室廬收割禾稻以爲度寒之計勿復疑畏逡巡自失生業有負本軍門惓惓至意也特示

康熙十七年十月十二日

給示漳浦縣二十八都

爲哀陳大慘等事據漳浦縣二十八都頂趙保生員趙與成等呈稱成等所居都保數年以來慘遭海寇焚掠劫殺家傾命喪一二子遺僅存皮骨今幸

王師弔代哀鴻甫集涓澣沾恩似庶大兵進剿經過地方未免風鶴相率匍呈乞分涇渭給示安民庶殘黎得甦恩同再造等情到本將軍據此照得海逆狂逞剽掠沿邊以致婦女仳離民生憔悴披閱呈詞殊堪痛惻茲者大兵雲集原期殲滅梟獍安撫殘黎據

准前情合行給示爲此示仰所屬各標協營官兵人等知悉各宜仰體

皇仁恪遵法紀不得肆行騷擾擅動民間一草一木敢有故違者許該地方居民人等協力擒解定以軍法重處決不輕貸慎之切忽

康熙十七年十月十九日

出示四鄉

爲禁諭事照得漳郡人民自變亂以來叠遭海寇荼毒屋毀田荒妻離子散顛連萬狀不忍見聞茲值大兵雲集子遺殘息勉力趨公本軍門前時艱痼瘵念切誠恐不法兵斯肆行作踐擾我哀鴻除行中軍密遣弁目於各要路口不時巡拿外合行出示嚴禁爲此示仰所屬各標協營官兵人等知悉務宜凜遵法紀和睦居民敢有擅入鄉村拆毀門戶短價強買索取菓蔬及放縱馬匹踐損田園者許爾士民人等

協力擒赴軍前以憑緝責柳示決無輕貸慎之毋忽

康熙十七年十月二十一日

曉諭赴閩逃兵

爲再行曉諭逃兵歸伍以申

國法以全私恩事照得本軍門原帶江南兵丁二千名
入閩因念爾等長途跋涉內顧維艱特爲

題請行坐糧餉併請支家口月米以贍父母妻子其體
恤下情亦至周至倘不謂爾等冥頑無知未及半途
逃走甚多甚有拐帶盛甲馬匹脫逃本軍門不得不
造冊 題明業承 部文於原營追查嚴緝

國憲具在誰敢窩匿在營弁若知情容隱恐干抗

言之愆在隣佑若扶同不舉恐坐窩藏之責是爾等勢必東逃西竄不敢出頭徒自偷生人世且累及父母妻子監禁比責是先爲顧戀父母妻子而逃今反貽累父母妻子矣清夜自思能無追悔本軍門垂念爾等跟隨有年或經拔材官或素稱臂指茲以顧戀家室竟犯脫逃之譴以致竄亡失所家口流離不勝軫念姑開生路再行諄切招諭爲此示仰脫逃材官兵丁知悉各宜悔過速赴江南各原營將領投首具文呈送來聞本軍門卽爲查照原名收伍起支行坐糧餉

其從前過犯槩爲寬宥不完上可以報

國恩下可以全家室且本軍門從江西山東以至江南歷任多年從不肯失信於人爾等皆屬舊丁諒俱悉知况此項官兵本軍門已經

題明立爲援剿左右二營俟聞省事平仍回江南歸伍斯時家室團聚豈不公私兩全倘執迷不悟希圖倖免營弁旣不敢收留隣佑又不敢容隱骨肉離散完聚無期一經擊解身罹法網噬臍之悔嗟無及矣思之愆之母負惓惓至意可也

康熙十七年十月二十九日

示小石洞

為懇恩給示以安殘黎事據蔡奕保嶺堯社小石洞鄉民蔡明等呈稱蔡明等住居萬松關地方屢遭海寇荼毒無奈逃插小石洞棲身幸逢大師進剿殘民得出湯火相率叩乞出示禁戢拆毀房屋小民得安等情到本軍門據此照得兵馬進剿逆寇原為弔民伐罪豈容恣行騷擾重困吾民今據前情合行示禁為此示仰所屬各標營兵廝知悉務宜恪守紀律不得擅拆民房及滋擾奪騷擾等弊敢有故違許該地

方人等協力擒解定行細責遊營決不輕貸慎之毋
忽

康熙十七年十一月初三日

曉諭漳屬

為嚴禁拆毀房屋以奠哀鴻事照得漳屬士民久遭
海寇蹂躪備極困苦今大兵雲集期在除暴安良乃
有一二不法兵士擅將民房拆毀致哀鴻棲址無地

殊可痛恨除經面請

將軍暨

督撫兩院共相通飭

外合行出示嚴禁為此示諭轄屬各標大小營分兵
隨人等知悉凡城內城外一切房屋俱不許擅動寸
椽片瓦敢有無知兵士不守法紀仍前肆行拆毀者
許該地方士民協力擒解定行細責枷示決不輕貸

慎之母忽

康熙十七年十一月十七日

曉諭三十六等都

爲招諭殘黎歸業事照得南安三十六七八都地方
逼近大小盈一帶爲山海寇盜出沒之區該都士民
久遭逆賊殘害田廬荒廢于故鄉少壯逃徙于窮僻
本軍門不勝軫念茲特會同 總督部院牌委副將
沈大捷前往該縣三十七都聯洛鄉身守禦營隨招
撫流離歸復故業去後合行出示曉諭爲此示仰三
十六七八等都士民人等知悉茲值海寇敗遁歸巢
歲序告終春耕在卽爾等各宜及時

歸家盡力耕種仍共相聯絡守望相助遇有警息聽副將沈大捷調度堵禦就近飛報防兵分頭夾剿至爾等雜項徭役本軍門業經行縣暫爲豁免以恤哀鴻務使爾等安心復業倘汛防官兵敢有借端騷擾者許爾地方人等稟報定行嚴拿重處斷不姑容爾等其仰體本軍門招徠至意各速相率歸里勿復流蕩他鄉自失故業也特示

康熙十七年十二月初四日

示禁雙橋

爲嚴禁勾通接濟以絕內奸以殲外寇事照得海賊劉國軒等以水面游覓嘯集餘黨恣行剽掠沿邊人民塗炭已極今滿漢大兵雲屯漳屬相機搗巢業經相定邊界現在遷移清野計並賊絕糧烏合之衆不久勢當潰敗在爾附近村庄人民久遭寇虐自當恨入骨髓絕不勾通斷無復濟盜糧之事乃近訪聞有等走險奸民駕駛小艇每乘便裝運米穀私通接濟本軍門尚不深信於本月初四日差兵假扮鄉民密

行探訪果於雙橋地方見有小船載賊數人上岸差
兵追趕餘賊急奔上船只擒長髮活賊一名吳應審
據口供係偽中衝鎮陳姓下之細作差來追取餉米
等情夫以大兵屯住于此而爾等在營盤之後尙敢
大膽勾連作奸則其從前之從逆爲害不問可知本
應盡行剿蕩姑念愚民無知且內中亦有良善之輩
未忍盡行斧鑕除將逆賊一名吳應梟首示衆外合
行嚴諭爲此示仰雙橋并附近各村庄人民知悉嗣
後各宜洗心滌慮擯絕逆寇若有奸惡巨擘潛行接
濟即便會衆舉首以憑嚴拿正法倘仍前互相容隱
陽順陰違包藏禍心暗通線索或爲擒解
定將保甲人等槩行誅戮法在必行斷不姑貸慎之
毋忽

康熙十七年十一月初四日

給示大小盈

爲嚴禁差員勒索之弊以安防兵以固邊汛事照得
大小盈一帶逼近東石逆穴爲山海寇盜出沒之衝
本軍門調撥本標官兵防守原令其等剿逆賊匪固
地方非令其伺候過往差員供應早暮也近訪聞有
一二奸棍假充旗營差官經過該汛輒敢恣肆勒索
酒食勒應床鋪稍不遂意拳踢交加夫以冲繁要汛
官兵晝夜枕戈勞苦已極而月關糧餉除養贍父母
妻子外卽日用尙苦不敷今乃欲責令其供應酒食

鋪蓋徹骨窮丁何能措備擾兵藐法殊堪髮指除差
官巡查拿究外合行嚴禁爲此示仰該汛防官兵知
悉爾等但晝夜小心勤慎瞭探堵剿賊寇保守地方
至于各衙門并大小各營過往差員遇晚無處棲身
姑許其入寨安歇若有刁橫奸棍敢再仍前需索供
應酒食床鋪者許卽指名稟報以憑咨會
督兩院
查明拿究斷不輕貸特示

康熙十七年十二月初九日

示泉州府

爲曉諭事照得

朝廷平時不惜金錢愛養官兵原期預備調遣効力疆場
在各官兵尤當不辭艱苦盡心圖報庶幾可以少酬
國恩之萬一如本軍門前任江南雖有夙夜匪懈執掌
戎務之時然地方寧謐亦有安逸之會及奉

旨調補閩省豈不知懇切控辭惟以臣誼當然遂兼程赴

任茲爾等皆係本軍門

題調入閩且久受

朝廷之豢養自宜及時報効况地方多故正壯士立功之
秋所當勉激勵殺賊樹勛况 部文開載事平之
日各官兵願在閩者留閩補伍願回籍者發回原省
本軍門已經通行遵照在案今復現在會同 督兩
院 題練水師製造船隻尅期水陸并進夾剿逆賊
不過一二年間便可掃蕩鯨鯢肅清海甸斯時本軍
門自當再疏

題明聽爾等回歸原省則父母妻兒骨肉如故豈不忠
義兩全公私盡美茲訪聞爾等初到泉州聽信煽惑
訛言謂本軍門將搬爾等家口來閩以致聚談紛紛
心緒弗寧此皆無良奸棍妄架浮言欲令爾等脫逃
便於途中邀截非誘跳營卽加詐嚇爾等何不回思
本軍門若必令爾等搬家則當日

題疏之內早已敘明豈待今日除屢行左營朱副將善
爲慰諭安插外合行示諭爲此示仰新到各官兵知
悉爾等各安心靜聽勿復過信浮言本軍門統師南
征所有各營弁員俱隨帶行間未及遣發收管爾等
且仍聽各原營將弁約束在泉稍加休息至於應關

糧餉已經檄行府縣預准支給其日食蔬菜可照價市買不得生事滋擾亦不許民間高價勒措且爾等起身赴閩之時本軍門准有 山東總河巡撫 各部院咨文俱取有連名的保倘聽信訛言生心逃逸爾等俱係奉

旨入閩之人本軍門不便庇護必當

題明行文原省拘緝斯時上累父母下累妻孥仍當一起押解來閩既多一番跋涉且又終身無復歸鄉之望矣本軍門爲爾等統帥不得不先事宣諭爾等務

自猛省毋負惓惓至意

康熙十七年十二月十一日

示西坑社

爲懇恩示禁以蘇殘黎事據二十七都西坑社鄉民李憲李守等呈稱憲等住居本社逼近管盤米粟掠盡惟望柑樹獲存明年收成亦可苟全蟻命荷蒙仁慈嚴戢兵丁不許砍伐乃別營兵廝罔遵軍法將柑樹亂砍居民不敢阻止不特二十年功力廢於一旦而流離殘喘將來無所指望勢填溝壑伏乞出示嚴禁庶殘黎不至死亡等情到本將軍據此照得漳屬人民遭海寇殘害已極田廬荒圯衣食無資今所存

柑樹數株尚可與望收成為將來餬口乃有無賴不法兵厮肆行砍伐以致子遺失望匍匐叩呈殊可憫

念除經面請 將軍暨 兩院共相禁戢外合行

嚴禁為此示仰各營兵厮人等知悉各宜存此良心

恪守法紀不得再行肆砍柑樹以絕窮民衣食敢有

故違者許該地方百姓人等協力擒解軍前以憑會

同 將軍督 兩院從重究處斷不輕貸慎之毋忽

都統

康熙十七年十二月二十三日

曉諭援閩兵丁

為曉諭事照得閩省多事剿禦需兵本將軍兩任東

魯備知山東河南皆係曉勇精健之旅是以特疏題

請撥發勁兵三千名調赴來閩以資征剿續准

總河部院 咨開親行點驗選員統領并造送年

貌籍貫以及家屬保狀在案今東省兵丁已抵泉州

河南兵丁亦漸次將到但本將軍現在行間剿賊俟

旋師之日親行點驗分撥入伍恐兵馬初到缺乏糧

餉已檄行在泉將領暨道府各官措給月餉以資卽

次之宿飽并令善爲安插以慰爾等遠戍之心近聞調來日兵內多有無知思將隨帶餘丁私相頂替在閩本人仍欲歸東殊干法紀合行出示曉諭爲此示仰調到東豫各目兵知悉務須恪遵軍紀安心在閩用力疆場本將軍自當破格優待俟平定之日願回籍者聽其自便願在閩者仍歸原伍該管隊目務要互相稽察不許一兵頂替日後或有訪聞或被首舉定將本隊并頂替之人一並以軍法重處仍咨移東豫督着落家屬按名嚴拿決不姑貸各宜凜遵毋得自干三尺有負本將軍愛養爾等至意

康熙十七年十二月二十七日

給各協營張掛

爲申嚴接濟指示迷途以絕盜糧以全善類事照得
海逆狂逞肆亂邊陲三十餘年慘行荼毒罪惡貫盈
天人共憤茲者大兵雲集分扼咽喉斥瀕海地方已
經畫界清野逆島之中糧草已絕島合之衆接踵投
誠者日以數千百計賊勢已困衆志久離我兵惟俟
兩月之內修完船隻即可水陸夾攻掃除鯨鯢誠恐
爾等僭民猶懷觀望潛行接濟是齎盜以糧而自樹
敵也合行再申嚴禁爲此示仰附界各鄉保地方士

民人等知悉爾等三十年來叠遭逆寇擾害田廬荒廢眷屬流離當必恨深骨髓共切驅除務宜乘彼垂亡之候痛加擯絕如有零星小夥潛入該地方索派米糧等物亟須會同鄉壯協力擒解立時正法如係大夥賊徒一面會衆堵禦一面飛報防官統兵撲剿若保甲之內有不肖奸民陽順陰違暗通逆寇線索者卽行舉首擒拿以杜勾通暗害信能如此則盜糧日盡窮島孤危大兵水陸會討旦晚廓清爾等士民可永享安寧之樂矣倘有一二無知不記向來之慘禍但圖目下之勾通私受金錢賄濟米穀或經訪聞或彼首告審實有據定將本犯并鄰作十家俱以通賊論斬斷不輕貸至於爾等若有族屬親戚或被逼脅煽誘悞陷賊中者速宜傳述

朝廷德意及本將軍寬政令其作速歸來從前所犯概行免究補伍歸農悉從民便蓋賊魁劉國輝吳淑等皆身犯大逆重罪無顏回首故忍死依附鄰鄉苟延旦夕之命爾等原係良民被逼情有可矜且無重大過愆何苦逆留賊營忍棄祖宗坟墓而甘爲絕島之游

竟乎禍福兩途惟爾自擇勉之念之須至告示者

康熙十八年二月初五日

給示漳州

爲再嚴兵所擾害之禁以莫哀鴻事照得漳屬人民
既遭海寇荼毒之慘又苦兵馬力役之繁僅存殘喘
最可矜憐凡有良心之人見此流離情狀應生惻怛
乃聞各營兵所蔑視法紀每三五成羣以竄取火柴
爲名或突入民居恣意搶掠或拆毀門戶不留寸椽
嗟此予遺何堪重遭困苦若此除經咨會

平南將軍嚴行禁緝外合再示禁爲此示仰各營兵
總管部院
斯人等知悉爾輩亦屬人類何得喪盡良心忍使垂

斃殘黎呼天號地自示之後各宜稍存善念留此數鄉民生以爲將來供應夫役糧草之地倘敢蔑視不遵仍前恣肆騷擾居民者許該地方汛防官兵鎖拿呈解以憑咨會

平南將軍
總督部院從重究處斷不輕貸愼

之毋忽

康熙十八年二月十一日

曉諭合屬士民

爲恢復岳州府城事本年二月十九日准 兵部咨開據安遠靖寇大將軍多羅貝勒察尼等疏稱本年正月十八日有僞總兵王度冲僞將軍陳珀等各率本標官兵船隻投誠前來臣等恐賊逃遁亦未可測隨即分佈官兵堵剿去後本日戌時據分佈堵剿署護軍統領希福旁蘭大達布總兵官李世英等啓稱賊皆逃遁我官兵俱已進岳州府城等因據此隨遣輔國公溫齊率領蘆角南津港官兵諭令務必速追

抄至賊前堵剿又酌量添撥滿洲蒙古官兵令叅贊軍務頭等台吉葛勒爾圖率領前去與公溫齊協力務將賊首吳應期擒斬去後因水陸投誠官兵甚多尚未安插於第二日早晨復遣署副都統馬尼等帶領官兵追剿但吳應期等既經逃遯又恐前據湘陰亦未可定仍遣都統覺羅朱滿率領大兵攻取湘陰復思乘此逆賊膽裂鼠竄之時卽宜速進故遣固山貝子章泰率領大兵攻取葉容石首去後該臣等看得逆賊吳應期等盤踞岳州將近六載負固死守蒙皇上洞鑒調發官兵船隻之後雖水陸官兵仰副救民水火早登衽席之宸衷不避風浪奮勇堵剿絕賊外援斷賊糧運堅固圍困得以恢復岳州實皆

皇上威靈遠被如天地覆載之恩所致也投誠僞將軍總兵以下大小官共六百餘員兵丁五千餘名得獲烏船二十六隻沙快等船四十餘隻紅衣大炮四十七位水陸大小砲六百餘位旗幟盔甲烏鎗大刀器械等項甚多爲此具本謹題康熙十八年正月二十一日題二月初二日奉

青覽具勒奏水陸大兵圍困岳州斷賊糧道僞總兵王度
冲僞將軍陳珀等率領僞官兵丁船隻器械等項投誠
餘賊逃遁恢復岳州府城具見調度有方可嘉在事有
功人員着議叙具奏兵部知道欽此欽遵抄出到部相
應通行直隸各省王侯將軍督撫提鎮等遍行所屬
曉諭爲此合咨煩爲轉行所屬一體欽遵施行等因
到本將軍准此照得逆賊吳應期死守岳州六載被
大兵圍困糧盡勢窮膽裂鼠竄今要地已歸版圖逆
孽指日掃蕩茲准前因合行示諭爲此示仰遐邇士
民人等知悉湖南巨寇次第蕩平區區海道何難授
首現在勵兵秣馬整頓船隻刻期水陸夾擊便可肅
清海甸爾等士民指日可享昇平勿復更懷疑慮至
於脅從僞官兵人等尤宜及早投戈星速來歸既可
保全首領并得進取功名若執迷不返自貽誅戮骨
碎江魚魂棲絕島孰得孰失亟加猛省可也

康熙十八年二月二十三日

曉諭泉屬

爲恭報恢復長沙郡城事本年二月二十三日准
兵部咨開該議政王等會覆偏沅巡撫韓 題前事
等因康熙十八年二月初一日題本月初九日奉
旨議政王貝勒大臣會議具奏欽此該臣等會議得偏撫
韓 疏稱長沙逆賊自度力不能支於本年正月二
十九日率領賊衆由西門過江奔逃安親王與臣等
隨於本日入城安撫百姓等因查偏撫韓 疏內旣
稱長沙逆賊自度力不能支率領賊衆過江奔逃安

親王隨於本日入城安撫百姓等語應將原疏抄錄
卽行陝西廣東廣西福建所有大將軍將軍督撫提
等通行曉諭其 盛京寧古塔將軍等亦應行文曉
諭俟大將軍安親王等題疏到日齊集 午門曉諭
刊刻告示曉諭直隸各省交與理藩院亦應曉諭四
十八旗可也等因康熙十八年二月初九日題本日
奉
旨依議速行欽此合咨煩爲轉行所屬一體欽遵施行等
因到本將軍准此照得逆賊吳三桂負

恩謀叛荼毒生靈天怒人怨已服冥誅今黨羽人各爲心
爭相潰散不半月之間岳州長沙兩郡相繼克復歸
我版圖則滇蜀各省指日蕩平是

人心之厭亂與逆謀之不終靡若指掌今准前因合行示
諭爲此示仰遠邇士民及脅從僞官兵日人等知悉
誠思吳逆當初叛之時聲勢何等颯張今一旦冰消
瓦解不啻發雲振落乃區區海逆僅以一島之微盜
奔潢池狂逞跳躍釜魚堂燕有識之士當有灼然明
決在我士民可以安心耕讀卽脅從人等並宜各自

爲謀及時歸正若頑冥無靈潛相依附徒取誅戮遺
臭萬世本將軍爲爾等全閩統帥不忍坐視迷淪再
申教誡正爾等悔禍求生去危卽安之日也各宜祇
遵毋自貽戚特示

康熙十八年二月二十五日

分示要汛

爲申明犯界之條以杜透越以遵 功令事照得海
逆肆逞荼毒生民三十年來干戈不息致閩南半壁
廬井丘墟田園荒蕪流離困苦觸目傷心

朝廷遠恤殘黎罹茲湯火特發滿漢雄師剪逆拯良今島
賊屢敗之後勢孤糧盡困守巢穴希圖倭掠內地并
勾奸民接濟以延殘喘近自奉 旨照順治十八年
例悉將近海居民遷入內地申明界址不許一人擅
出界外行走禁約霜嚴凡我百姓自當凜遵舊例共

相循守乃近訪聞有等不法奸民罔顧身家性命貪
圖微利竟將柴米併違禁貨物私運出界接濟逆孽
殊堪髮指獨不思兵民困苦皆緣逆賊跳梁今若防
堵甚嚴杜絕接濟俾賊夥日用無措則釜底游魂勢
當自斃何乃甘心通賊貪小利而忘大害私齎盜糧
養寇自悞本將軍入閩以來凡有利於民生者皆力
爲請命獨此奸頑犯法斷難寬假合行飭禁爲此示
仰各汛防官兵知悉嗣後如有前項奸徒潛出界外
私運柴米併一切違禁貨物勾通接濟者立即擒拿
不拘兵民俱以通賊立斬無赦卽在附界內地爲賊
買置違禁貨物潛謀出界或被訪聞或被首發亦必
立拿審實從重究處如汛防各將弁且其不力行盤
察嚴加躡緝及縱容子弟倚藉營頭名色違禁犯法
者或經鄰汛拿獲卽將該汛弁目倍加從重治罪外
該營協營將領一併飛章奏處斷不輕貸仍每月各
具並無出界奸徒甘結呈繳以憑查考事關禁止透
越該將領功名身命攸繫各宜凜遵毋得延視自貽
伊戚慎之

康熙十八年四月二十日

示東豫新兵

為申飭營兵脫逃以肅軍紀事照得

朝廷平時不惜金錢募養官兵原期其効力疆場殺賊禦侮若無事則坐糜糧餉調用則相率脫逃忘恩負國畜此何為茲據左營朱副將呈報河南百總朱烈武倡率兵丁石愿等七十餘人相率脫逃隨差馬兵分追現獲二十三人投回十一人呈請示奪等情前來似此紛紛逃竄大干軍紀除批將倡首百總朱烈武斬首示衆獲回逃兵石愿等二十二名各緝責五十

棍穿箭遊營其自己投回之楊春來等十一名念係無知被誘姑准免責至於未獲之衆移咨 河南撫院緝拿并監比各兵家屬外合行示諭爲此示仰河南各標營并山東河撫兩標新兵人等知悉爾等皆係奉

旨調入閩疆本將軍先已咨會 各省督撫部院將爾等家

口取具的保在案縱使脫逃回家本將軍移咨拘緝

本省督撫部院亦必咨解前來况本將軍屢經申飭各

營將領於各處要口設兵盤詰凡係身無照票踪跡

可疑俱令鎖解軍前如有徇縱飛章叅處在各將弁自以功名爲重誰敢疎忽聽爾等潛逸是此萬里關山重重津隘旣難飛越何苦自罹法網如宋烈武之身首異處石愿輩之細責遊營覆車在前當思改轍本將軍爲爾等正帥法之所在不便姑容情有相關再申教誡爾等其各猛省勿負此惓惓保全之意可也慎之思之